

ursachen/nach dem sie gegen einem/oder dem andern Planeten stehen. Nach der Regul Alchindi seynd die hitzige Planeten Sol vnd Mars: Die kalte Saturnus vnd Venus: die so Regen verursachen seynd Venus, Mercurius vnd Luna. Saturnus, Mars vnd Mercurius bringen Ungewitter. Item/das die coniunctiones, oppositiones vnd Quarten der Sonnen vnd desmonds/auch vnder verschiedene dispositiones der Luft verursachen. Darüber du viel schöner vnd nützlicher



Reguln findest bey dem Baptista de Rubertis, in seinen obseruationibus Astrologicis, desgleichen auch bey andern Authoribus, so beydes in Lateinischer vnd Italianischer Sprache/ von Ursach vnd Verenderung der Luft vnd des Wetters geschrieben haben.

Wolan mit solchen obseruationibus kan man Calender/Practicken/Prognostica vnd andere dergleichen indicia, auch bis auff die

Nativitet stellen/wie wol man sich doch nicht zu viel auff diese Kunst zuverlassen/sintemal sie so vngewiß/vnnd so vnbeständig/als der Mond selbst/vnnd wirdt mancher Phantast durch die Phantastische Calenderschreiber betrogen. Welcher aber die Warheit ohne einigen Fehl oder Mangel schreiben will/der bleibe bey diesen gewissen vnnd vnfehlbaren Aussagen/nemblich: Das künfftige Jahr wirdt haben drey hundert vnnd fünf vnd sechzig Tage. Das Jahr wird im Januario angehen/wirdt zwölff Monat haben/vnnd zwey vnd fünfzig Wochen: Die Planeten werden ihren gewöhnlichen Lauff behalten/zu vnderchiedlichen Zeiten wird Hitz/Frost/Regen/vnd schön Wetter einfallen: Es wird ein solches Jahr seyn/das man in demselbigen essen/trincken/springen/tanken/seyren/arbeiten/seen/ernden/ze.wirdt/aber vnder dessen wirdt auch mancher harter Kopff drauff gehen:junge Weiber werden schwanger werden/Kinder gebären/nicht ohne Schmerzen vnd Gefahr/die lang gefräncket/werden sterben/oder wirdt ein Wunder seyn/wann sie widerumb auffkommen: grosse Herren werden diß Jahr herrschen/vnd Bawern müssen vnderthan seyn: Krieg vnd Blutvergiessen wirdt nicht ohn schießen vnd schlagen abgehen: bey guten Wein wirdt mancher lustig oder berauscht werden: bey Hochzeiten vnd Gastungen gehet es vber Schüsseln vnd Randten/vnnd müssen die Glässer manchen Stoß außstehen/kömen auch nicht alle ganz darvon: Vmb Fastnacht gibt es Narren: Soldaten werden gern einen frischen Herrn haben/die Seeräuber gern auff dem Meer halten/die Pilgram vnd Ziegeiner sich sehen lassen/die Geistlichen gern reysen/die Kauffleuthe/Krämer vnd Bucherer gern gewinnen/die Schüler gern ferias vnd Spieltage haben/junge Leut gern schercken. Item/bey für